

2011 Rhif (Cy.)

**DIOGELU'R ARFORDIR,
CYMRU**

**DIOGELU'R AMGYLCHEDD,
CYMRU**

**RHEOLI PERYGL
LLIFOGYDD, CYMRU**

Rheoliadau Apelio ynghylch
Gwybodaeth am Reoli Perygl
Llifogydd ac Erydu Arfordirol
(Cymru) 2011

NODYN ESBONIADOL

(Nid yw'r nodyn hwn yn rhan o'r Rheoliadau)

Mae'r Rheoliadau hyn yn darparu hawl i apelio yn erbyn cosbau a roddir o dan adran 15 o Ddeddf Rheoli Llifogydd a Dŵr 2010 (p. 29) ("y Ddeddf") o ran Cymru. Maent yn rhoi awdurdodaeth i Dribiwnlys yr Haen Gyntaf i ystyried apelau a wneir o dan y Rheoliadau hyn. Maent yn gwneud darpariaeth ar gyfer gweithdrefn, gan gynnwys: y seiliau dros apelio; effaith apêl; a phwerau Tribiwnlys yr Haen Gyntaf wrth ddyfarnu ar yr apêl.

Mae Rheolau Gweithdrefn y Tribiwnlysoedd (Tribiwnlys yr Haen Gyntaf) (Y Siambr Reoleiddio Gyffredinol) 2009 (O.S. 2009/1976) hefyd yn llywodraethu apelau o dan adran 15 o'r Ddeddf a'r broses o ddwyn apêl.

Mae asesiad o'r effaith a gaiff yr offeryn hwn ar gostau busnes, costau'r sector gwirfoddol a chostau'r sector cyhoeddus ar gael gan: Yr Is-adran Newid yn yr Hinsawdd a Dŵr, Llywodraeth Cynulliad Cymru, Parc Cathays, Caerdydd, CF10 3NQ.

Rheoliadau drafft a osodir gerbron Cynulliad Cenedlaethol Cymru o dan adran 15(2) o Ddeddf Rheoli Llifogydd a Dŵr 2010, i'w cymeradwyo drwy benderfyniad Cynulliad Cenedlaethol Cymru.

OFFERYNNAU STATUDOL
CYMRU DRAFFT

2011 Rhif (Cy.)

**DIOGELU'R ARFORDIR,
CYMRU**

**DIOGELU'R AMGYLCHEDD,
CYMRU**

**RHEOLI PERYGL
LLIFOGYDD, CYMRU**

Rheoliadau Apelio ynghylch
Gwybodaeth am Reoli Perygl
Llifogydd ac Erydu Arfordirol
(Cymru) 2011

Gwnaed

Yn dod i rym

6 Ebrill 2011

Gwneir y Rheoliadau hyn gan Weinidogion Cymru, drwy arfer y pwerau a roddir gan adrannau 15(8)(1), a 48(2) o Ddeddf Rheoli Llifogydd a Dŵr 2010(2), o ran cosbau a roddir gan—

- (a) awdurdodau llifogydd lleol arweiniol ar gyfer ardaloedd yng Nghymru,
- (b) Asiantaeth yr Amgylchedd o ran methiant i gydymffurfio â gofyniad mewn cysylltiad â swyddogaeth rheoli perygl o lifogydd neu erydu arfordirol o ran Cymru, ac
- (c) Gweinidogion Cymru.

(1) Rhoddir y pŵer gan adran 15(8) o Ddeddf Rheoli Llifogydd a Dŵr 2010 i “the Minister”, ac mae adran 15(10) o'r Ddeddf honno yn diffinio “the Minister” at ddibenion yr adran.

(2) 2010 p.29.

Ymgynghorwyd â'r Cyngor Cyfiawnder Gweinyddol a Thriwilysoedd ac mae'r Cyngor hwnnw wedi ymgynghori â Phwyllgor Cymreig y Cyngor Cyfiawnder a Thriwilysoedd, yn unol ag adran 44 o Ddeddf y Triwilysoedd, Llysoedd a Gorfodaeth 2007(1) a pharagraff 24 o Atodlen 7 iddi.

Mae drafft o'r offeryn hwn wedi ei gymeradwyo drwy benderfyniad gan Gynulliad Cenedlaethol Cymru yn unol ag adran 15(12) o Ddeddf Rheoli Llifogydd a Dŵr 2010.

Enwi, cychwyn a chymhwysio

1. O ran y Rheoliadau hyn—

- (a) eu henw yw Rheoliadau Apelio ynghylch Gwybodaeth am Reoli Perygl Llifogydd ac Erydu Arfordirol (Cymru) 2011;
- (b) deuant i rym ar 6 Ebrill 2011; ac
- (c) maent yn gymwys o ran cosbau a roddir gan—
 - (i) awdurdodau llifogydd lleol arweiniol ar gyfer ardaloedd yng Nghymru;
 - (ii) Asiantaeth yr Amgylchedd mewn cysylltiad â methiant i gydymffurfio â gofyniad mewn cysylltiad â swyddogaeth rheoli perygl o lifogydd neu erydu arfordirol o ran Cymru; a
 - (iii) Gweinidogion Cymru.

Dehongli

2. Yn y Rheoliadau hyn—

ystyr “y Ddeddf” (“*the Act*”) yw Deddf Rheoli Llifogydd a Dŵr 2010;

ystyr “hysbysiad gorfodi” (“*enforcement notice*”) yw hysbysiad a roddir o dan adran 15(1) o'r Ddeddf mewn cysylltiad â methiant i gydymffurfio â gofyniad o dan adran 14(1) neu (3) o'r Ddeddf i ddarparu gwybodaeth;

ystyr “hysbysiad o gosb” (“*penalty notice*”) yw hysbysiad gan awdurdod o dan adran 15(3) o'r Ddeddf sy'n rhoi cosb i berson sy'n methu â darparu gwybodaeth a bennir mewn hysbysiad gorfodi yn y cyfnod penodedig.

(1) 2007 p.15.

Yr hawl i apelio

3. Caiff person y rhoddwyd cosb iddo gan hysbysiad o gosb apelio i Dribiwnlys yr Haen Gyntaf yn erbyn y gosb.

Y seiliau dros apelio

4. At ddibenion rheol 22(2)(g) o Reolau Gweithdrefn y Tribiwnlysoedd (Tribiwnlys yr Haen Gyntaf) (Y Siambr Reoleiddio Gyffredinol) 2009(1), y seiliau dros apelio yw—

- (a) bod y penderfyniad i gyflwyno'r hysbysiad o gosb wedi'i seilio ar gamgymeriad ffeithiol;
- (b) bod y penderfyniad yn anghywir yn gyfreithiol;
- (c) bod swm y gosb yn afresymol;
- (ch) unrhyw reswm arall.

Y weithdrefn

5. Rhaid i'r canlynol fynd gyda hysbysiad o apêl(2) o dan reol 22 o Reolau Gweithdrefn y Tribiwnlysoedd (Tribiwnlys yr Haen Gyntaf) (Y Siambr Reoleiddio Gyffredinol) 2009 (yn ychwanegol at fod yn rhaid i'r hysbysiad gydymffurfio â gofynion y Rheolau hynny)—

- (a) copi o'r hysbysiad gorfodi;
- (b) copiâu o unrhyw sylwadau a wnaed o dan adran 15(2)(c) o'r Ddeddf;
- (c) copi o'r hysbysiad o gosb.

Effaith apêl

6. Rhaid i awdurdod sy'n cael hysbysiad o apêl gan berson y mae wedi rhoi cosb iddo beidio â chymryd camau i adennill y gosb ar ffurf dyled hyd oni ddyfernir ar yr apêl neu hyd oni chaiff ei thynnu'n ôl.

Dyfarnu ar apêl

7. Pan benderfynir ar apêl o dan reoliad 3, rhaid i Dribiwnlys yr Haen Gyntaf naill ai—

- (a) cadarnhau'r gosb;
- (b) lleihau'r gosb; neu
- (c) dileu'r gosb.

(1) O.S. 2009/1976.

(2) Gweler rheol 1(3) o O.S. 2009/1976 ar gyfer ystyr "hysbysiad o apêl".

Jane Davidson

Y Gweinidog dros yr Amgylchedd, Cynaliadwyedd a
Thai, un o Weinidogion Cymru
Dyddiad